

Visoki predstavnik pozvao lokalne organe vlasti da nastave s razvojem planine Bjelašnice kao turističke destinacije

Visoki predstavnik, Paddy Ashdown je u ponedjeljak izrazio svoju spremnost da se lično angažuje na zadacima koordinacije budućeg razvoja potencijala planine Bjelašnice, kao međunarodne turističke destinacije koja nudi sadržaje tokom cijele godine, i pozvao na uspostavu Koordinacionog odbora za razvoj Bjelašnice kako bi se osiguralo iskorištavanje ogromnog ekonomskog potencijala planina Igmana i Bjelašnice, a istovremeno zaštitio okoliš u području ove dvije planine.

Visoki predstavnik je o ovoj temi govorio na sastanku u OHR-u na kojem su sudjelovali svi nadležni općinski, kantonalni, entitetski i državni zvaničnici koji su na različite načine povezani sa razvojem planina Bjelašnica i Igman. Na sastanku su sudjelovali i ministar poljoprivrede FBiH, gospodin Marinko Božić, ministar prostornog uređenja FBiH, gospodin Ramiz Mehmedagić, premijer Kantona Sarajevo, gospodin Denis Zvizdić, načelnik općine Trnovo, gospodin Ibro Berilo i načelnik općine Hadžići, gospodin Halid Bajrić. Na sastanku su sudjelovali i direktor FIPA-e, gospodin Mirza Hajrić, te član SERDA-e, gospodin Omer Vatrić i gospodin Džemo Bisić, direktor organizacije "ZOI 84".

"Ukoliko potencijali Bjelašnice i Igmana budu razvijani tako da se u potpunosti zaštiti njihova prirodna ljepota, ove dvije planine mogu postati evropska turistička atrakcija i osigurati značajne izvore prihoda za općine Trnovo i Hadžići, Kanton

Sarajevo, Federaciju BiH i BiH u cjelini” rekao je visoki predstavnik. “Pažljivo i efikasno ulaganje bi moglo osigurati otvaranje čak novih 5,000 radnih mjesta u sarajevskoj regiji putem otvaranja objekata koji će tokom cijele godine privlačiti turiste. To je upravo ono što je učinjeno i u slučaju drugih evropskih skijališta.”

Napominjući da je Kanton Sarajevo već formirao Vijeće koje je izradilo prijedloge, visoki predstavnik je rekao da Koordinacioni odbor neće donositi odluke koje moraju donijeti nadležni izabrani organi vlasti. Odbor bi trebao pružati pomoć u koordiniranju aktivnosti vlada, ministarstava, institucija i zainteresiranih strana u cilju omogućavanja efikasnijeg i uspješnijeg napretka u realizaciji ovog projekta.

Osam sudionika na sastanku u ponedjeljak će biti članovi Koordinacionog odbora za razvoj Bjelašnice, dok će u toku narednih nekoliko dana biti odabrani i preostali članovi Odbora. Odbor će održavati sastanke svake dvije sedmice. Prvi sastanak Odbora će se održati u naredne dvije do tri sedmice, gdje će Odbor razmotriti korake koji su do sada poduzeti kako bi se u potpunosti iskoristili potencijali koje nude Igman i Bjelašnica, a zatim utvrditi i praktične načine za ostvarivanje daljnjeg napretka.